

Media Monitoring

Publication: **Berita Harian – Nasional (Online)**

Circulation/Audience:

Date: **29 November 2007**

Reference: **Monsoon Cup**

Headline: **Jaguh luncur layang-layang meriah pesta**

Jaguh luncur layang-layang meriah pesta

KUALA TERENGGANU: Jaguh dunia luncur layang-layang sebanyak empat kali dari Britain turut memeriahkan acara sempena kejohanan kapal layar Piala Monsun yang berlangsung di Pulau Duyong di sini dengan mempamerkan aksi akrobatik melawan arus angin dan ombak.

Aaron Hadlow, 19, dari Cornwall, England berada di The Heritage Bay Club Marina & Resort (HBCMR) di sini selama dua hari khusus untuk mempamerkan kehebatannya meluncur pada acara pembukaan Piala Monsun semalam.

Hadlow berkata, kedatangannya ke Malaysia khusus untuk memperkenalkan sukan lasak itu yang boleh dianggap masih baru di negara ini dan diharap melaluinya generasi muda akan lebih berminat dan berani untuk mencubanya.

Katanya, sukan itu walaupun memerlukan perbelanjaan yang agak tinggi iaitu sekitar RM4,500 bagi penyediaan peralatan, ia berbaloi kerana ia ada tarikannya tersendiri.

"Apa yang penting, peluncur memerlukan kepantasan angin secara semula jadi untuk menolak layar agar mampu meluncur dengan laju. Persekitaran serta keadaan cuaca di Terengganu sangat sesuai dengan sukan ekstrem ini dan saya yakin ia boleh dikembangkan di sini.

"Sukan ini mudah dipelajari kerana ia tidak mengambil masa yang terlalu lama untuk membiasakan diri dengannya kerana apa yang penting adalah imbangan badan yang menjadi kunci sukan ini," katanya pada sidang akhbar di HBCMR selepas mengadakan demonstrasi sukan itu semalam.

Hadir sama Penasihat Pertandingan Piala Monsun, Datuk Peter Gilmour. Sementara itu, Peter berkata, pengunjung yang datang ke Pulau Duyong berpeluang menyaksikan kemahiran dan bakat Aaron melakukan aksi dalam sukan itu.

Beliau berkata, kedatangan jaguh itu tepat pada masanya kerana ia bersesuaian dengan penganjuran Piala Monsun yang turut mempamerkan kehebatan pelayar menggunakan kemahiran dan sekali gus mengetengahkan sukan luncur layang-layang sebagai sukan baru yang boleh dikembangkan di negara ini terutama di Terengganu.